

EXERCITATIO MEDICA
DE

MEDICAMENTO- RVM GALENICO- RUM PARITER ET CHEMICORUM NE- CESSITATE

Q V A M
DEO FAVENTE

PRÆSIDE

DN. FRIDERICO SCHRADERO,
MED. DOCT. & PROF. ORD. ACADE-
DEMIÆ hodie PRORECTORE & FACUL-
TATIS MEDICÆ DECANO,

*Dn. FAUTORE, PRÆCEPTORE ac HOSPITE
suo omni observantia colendo*

Publicæ disquisitioni subjicit

JUSTUS OTTO QUENTIN

Göttingensis

AUTOR

IN MAGNO JULEO

d. IV. Julii Anno clb lcc XCI.

HELMESTADI,

Typis GEORG-WOLFGANGI HAMMII, Acad. Typogr.



Q. D. B. V.

TH. I.

Sterilitatem philosophicis studiis & evidens damnum Medicæ arti attulisse, quod plurimi ad unius sectæ, ob quædam rectè & commodè ab illa exposita, auctoritatem se contulerunt, dum ab aliis, veteribus pariter ac recentioribus, est monstratum. Quam materiam, ut exhaustam, equidem nunc tædiosè non recoquo, meo tamen, quod tractandum suscepi argumento, hoc valdè congruere censeo, veritatis studiosum esse & capacem liberum, nulli sectæ pressè adhærentem intellectum: *Æquum* enim, ut scribit Cicero i. Nat. Deorum, *libero judicio, nulla ejusmodi adstrictum necessitate, ut velit nolit sit certa quædam tuenda sententia.* Et omnino ut habet Plato in Charmide, *non quis dixerit, sed quam rectè dicatur, ubique considerandum.*

II.

Approbandam equidem cum Verulamio de augm. Scient. l. i. illam regulam facile largior: *oportet discentem credere*, illi tamen optimè annexum esse existimo; *oportet jam edoctum judicio suo uti.* Discipuli enim debent Magistris temporariam solum fidem judicii que suspensionem, donec imbiberint ar-

tes, non autem plenam libertatis ejurationem perpetuamque ingenii servitutem. Feliciores autem illi, qui in morosos propriarum hypothesium admiratores, & acerrimos defensores non incidunt, sed quibus in ipso studiorum ingressu eorundemque decursu autoritas ita laudatur, ut liberiore mente recedere ab eadem, & supra Præceptorum inculcatam doctrinam surgere permittatur. E singulis nempe verissima & optima seligere oportet, & secundum illos, qui sectam ἐκλεκτικὴν amplectuntur, ex diversis dogmatibus præstantiora excerpere; Dummodo ne audiant miscelliones, qui cum in veritatis scrutinio viam sequuntur quam reprehendit Vossius de sectis Philosophorum c. 21. nullo scilicet vel parvo pravoque judicio varia miscentes placita, quemadmodum imperitus coquus unâ multa jura confundit. Utut enim difficile utique sit, verum à falso in ista sententiarum diversitate discernere, juventuti præsertim præcipitantiae obnoxiae, & industriam id majorem requirat; laudatissimum tamen est, ita progredi, & præstantissimi philosophorum hac ingenua libertate usi fuerunt. Cum enim nemo sit erroris prorsus expers, præclarum est atque eximium, rationis momenta, firmo experientiae fulcro rectè superstructa magis, quam placita horum illorumve sequi. Autoritatis equidem magna sæpe ratio est, & esse debet, aliquando tamen illa plurimum rationi obest, ut satius sit, etiam in Medicina, prudens Magni Hugonis Grotii consilium sequi, inquentis: *Nulla secta est, quæ omne vidit verum, nulla quæ non aliquid ex vero; veritatem ergo per sectas sparsam & diffusam colli-*

colligamus oportet. Hanc cupide ubique amplecti oportet, absque scrupulosa & inepta peruestigatione num ex Hippocratis, Galeni, Helmontii, Methodicorum, Dogmaticorum, Empiricorum, Spagyricorumque schola prodierit.

III.

Adduxi hæc propterea, quia, dum in Medicis studiis per quatuor jam annos in inclyta hac lulia versatus sum, id clare observasse mihi sum visus, regulam hanc præcipue etiam in medicamentorum, vincendis morbis idoneorum, selectu tenendam esse; vacillare illam medicinam, mancam & insufficientem esse, quæ vel Chemicorum efficaciora, essentificata, exaltata, ad minorem molem coacta, ubique præfert; vel, securitatis majoris prætextu, vulgari-bus & Galenicis vulgo nuncupatis penitus contenta est. Experientia enim, quæ sola hæc determinare potest, & indubios medentes reddere, persuadet, medio tutissimos ire, illos scilicet, qui prout vel robur, constitutio, temperies ægrotantis, vel morbi indoles exposcit, modo hæc, modo illa, seligere & præferre norunt.

IV.

In illorum ergo sententias non imus, qui probatissimorum medicamentorum pertæsi, id operam dant, ut nova semper, efficaciora, subtiliora & penetrantiora excogitent & inveniant, quæ specificorum & arcanorum titulo extollunt, immemores vel etiam ignari salutaris illius Petri Foresti moniti, quod adducit l. IX. obs. 23, ubi ait: *Temerarium & stultitiæ insignis argumentum est, in ancipiti medicamento pericu-*

lum facere, cum nulla cogat necessitas, & meliorum copia suppetat. Placuit semper iudicium Jacobi Primerosii de illis Clinicorum secretis, quod habet l. i. de vulgi errorib. c. 12. *Hæc quatuor si bene noverit, verba ejus sunt, morbum, methodum medendi, materiam remediorum & componendi rationem, istis secretis non eget, nam remedia non minus bona præscribere poterit, forsitan etiam meliora, quam sunt ista secreta tam magnifice jactata. Legi alicubi historiam Capi-vaccii, in Epist. Scholzii, qui à Germanis rogatus, ut sua secreta communicaret, aptissimè respondisse fertur: Legite meam praxin & invenietis mea secreta; In quo libro nihil secretum, nihil arcanum est. Memini me audi-visse Varandæum in Academia Monspeliensi Professore Regium dicentem: remedia esse optima, quæ minime sunt secreta, sed notissima, utpote certiori experientia confirmata, & recte sanè.*

V.

Ut propius ad scopum pergamus, duplicem pharmaciam non male statui, largimur Wedelio, qui in limine Pharmaciæ suæ opinionem hanc retinuit, utut *ἁτοπον* idipsum aliis videri cognovisset. Pharmacia enim cum sit ars & præparandi & componendi medicamenta, id quidem, antequam Chemiæ usus magis invaluit & approbatus fuit Galenici non ineptè effecerunt, crescente tamen experimentorum numero, & indefesso aliorum labore, ad artis majorem perfectionem tendente, addita Galenicis & vulgaribus illa fuerunt, quæ in morbis gravibus utilia valde, reliquis efficaciora fuisse usus manifestavit. Atque sic elegantior parandi combinandique medica-
men-

menta modus, ad certos casus, in quibus rem peragere ordinariis non licuit, accommodatior, detectus est. Quamvis igitur stet maneatque laus sua medicamentis Galenicis, sublimior tamen & selectior pharmacia Chemia est, quæ initio quidem illa olim usitatis addidit, quæ ex metallis conficiebantur. Labor enim Chemiæ in primis incunabulis suis fuit metalla excoquere, & in mineris ac divite gleba versari. Temporis tamen progressu altius naturæ rerum sese immerfit, animalium insuper cohortes, & vegetabilium quoque Regnum ingressa, unde tot suggestis igne paratis, auctiora, & multo instructiora nunc sunt Pharmacopolia. Et idem hoc ansam dedit de Artis nostræ incremento optimè meritis Viris, illam ruditatem & supervacuum tot simplicium cumulum corrigendi, & ad modum concinniores redigendi. Cum ergo Chemia sit nova Pharmaciæ pars, novusque ornatus, imo ipsissima Pharmacia selectior, amplius patet, conjungendam esse Galenicam & Chemicam Pharmaciā. Meliori enim via imo optima, planè secura, morbis superandis multo magis accommodata incedunt, qui utramque conjungunt, & amicè conspirare ac aptissimè convenire intelligunt, missō omni erga recentiores odio, nimiaque veterum admiratione, & vano solius antiquitatis amore.

VI.

Miser proinde erit Medicus qui Chemiam ignorat, miserior qui odit; quandoquidem ea modo est multorum morborum indoles, ea pertinacia, ut nisi majoris activitatis remedia Chemia suppeditet, agere quidem

quidem semper, peragere nihil, curare semper, sanitatem labefactatam restituere minime liceat. Quemadmodum enim crescentibus delictis, pœnas crescere debere statuunt Jureconsulti: ita mutato morborum habitu, & auctis iisdem à perverso magis rerum non-naturalium usu, alia excogitari, & ex proportionem morborum magnitudini æquari debuerunt remedia. Dubium enim non est, quin cum illa vorandi potandique & gulæ liberè indulgendi libidine remediorum materies se extendere debuerit. Habitus enim ingeniumque morborum in plurimis hinc mutatum est, & contumacia adaucta, adeo ut plurimi morbi olim benigniores & facilius vincibiles, nunc monstrum alant, & inusitatis symptomatibus sese exerant, quibus proinde nova & congrua ex æquo remedia opponenda esse methodus dictitat. Quare pulchrè pro more suo scribit eruditissimus Pechlinus: *Nec vulgata magis prodesse videas, sed nova usq; sollicitari & violenta remedia, quædam etiam in-visa & olim veneni suspecta, quæ si quis remedia repudiare vellet, & contemnere frigerent sanandi formulæ, steriliorque esset Medicina, quam pridem. Herbæ quondam sufficiebant curandis morbis, ast nunc nec metallis parcimus, duris in Vulcani officina natis remediis, nempe ut darent quod exstirpandæ infixæ altius malignitati valeret. Ultimum olim erat in Veratro solatium, & qui domesticis sanari non poterat morbus Anticyris expiabatur. Nunc autem non in insulas, tolerabilem certe pœnam, sed ad metalla damnantur ægri mortales, quo conceptum visceribus malum felicius evellatur. Ille Mercurius, Chemicorum Proteus, atq; in star Martis Home-*

Homericum ἀντομοειδὲς; illud antimonium semimetallum, ut cetera taceam, an non unica hodie & rarissima medicorum pignora, absq; quibus esset, jaceret Medicina sine succo & sanguine.

VII.

Aptè veteres vitream pituitam appellabant mucum illum firmiter adeo compactum, tenacis limi instar cohærentem, & plurima incommoda, diuturna valde & chronica, parientem; tales enim glutinosos lentos & modo non vitri instar concretos succos hæ-
rere in corpore, interdum etiam prodire ab eodem & excerni, Medicinam facientes, & quid in morbis eorumque curationibus eveniat intelligentes, probe norunt. Hæc autem viscida in plurimis affectibus peccans materia, partibus sæpe firmiter impacta & adhærens, non liquefit potionibus vulgaribus, non solvitur languidioribus herbarum aperientium (etiamsi nullam illarum omittamus) decoctis, non edomatur simplicibus magna etiam farragine confusis. Illis enim in affectibus à tali causa prodeuntibus, sanationis difficilius scopum, non nisi per accidens attingunt, & naturam ad edomanda hæc mala remorantur. Chemicis potius hic opus est, quæ facta hæc solidiora coagula fundant, & viscera à viscosissimorum humorum sarcina liberent. Advocanda sunt incidentia & attenuantia salia, fixa, enixa & volatilia; ex mercurio, marte, antimonio parata medicamenta. Hæc enim penetrantiora in tot casibus opem ferunt, ubi frustra capaces cyathi & ollæ integræ brodiorum Galenicorum epotantur. Mira his inest penetrandi & per corpus universum virtutem suam diffundendi

vis, quod in antimonio, herculeo illo medicamento, elegantiori hujus præparatorum apparatu gaudentes & in praxi sua utentes animadvertunt; quomodo scilicet puriora & subtiliora ex hoc educta sulphura in-exilissima quantitate magna agant, quomodo univ-
sum corpus pervadant, ad remotissimas partes atque
extimam corporis plagam pertingant. Deprehen-
disse se in ægris suis aliquoties retulit mihi Cl. Dn.
Præses, quid Sulphuris universaliter purgantis Glau-
beri quarta grani pars præstet in acrimonia feri deli-
nienda, lachrymarum mordacitate oculos infestante,
lippitudines molestissimas, ophthalmias cum unguis
& panni metu producente corrigenda; qui in mu-
liere artuum scorbutico dolore & defluxionibus ad pe-
ctus tam acribus, ut erosionem pulmonis & sanguinis
sputum inducerent, tantillam hujus sulphuris antimo-
nii dosin tenuis & acris feri motum stitisse, &, frustra
adhibitis antea aliis, periculosi morbi incrementa im-
pedivisse, annotavit.

IIX.

Ubi in ipso morbus radicem egit ventriculo, illa
è quibus elicere hic prius virtutem & medicamen-
tosam qualitatem sopitam excitare & in actum dedu-
cere debet, qualia sunt vulgaria medicamenta, pa-
rum valere, & ratio suggerit, & experientia evincit:
siquidem illa omnia, quæ copia sua obruunt, ven-
triculo sunt adversa, fermentum ventriculi suppri-
munt, aut eluunt, & laxitatem imbecillitatemque
ventriculi augent. Habent equidem grossæ illæ aro-
maticorum simplicium pulverisationes, & hinc prode-
untes trageæ, suum aliquando usum, plerumque ta-
men

men tædiosa sunt medicamenta , & parum commodi sæpe affert, quandoquidem necesse est, ut vigor ventriculi , earundem medicamentosam vim , recluso aromaticarum & spirituosarum particularum vinculo, remotisque inertibus involucris, extrahat: Unde rectius cum celeberrimo Sylvio loco talium Salia volatilia oleosa commendantur. Tantum certè hæc præstare sciunt Practici, quantum ab aliquot scatulis grossæ talis trageæ frustra expectares.

IX.

Quotiescunque in parte quæ à ventriculo & primis viis longius abest, vitium delitescit, & vel caput, vel partem aliam, remotiorem à primæ coctionis organis affligit, non facile remedium invenias, quod graduato & probe rectificato volatili sali sit præferendum. Magnum utique medicamentum habet in affectibus cerebri, ab intemperie ejus frigida proficiscens, qui penetrantem volatilem spiritum, aut salem, qualem Tartarus, Sal armeniacum, C.C. succinum fuligo suppeditant, possidet. Non recensebo nunc, quid hi volatiliū salium fluores in contumacibus chronicis affectibus præstent, quomodo internè & externè, congrumata & coagulata resolvant; sed id in primis urgeo, in subitis casibus vitæ interitum minitantibus subitum ab his, ab aliis vulgari modo paratis, non item, sequi auxilium. In convulsivis affectibus, hystericis pathematibus, asphyxiis, syncope ipsa, (quæ & apud Grammaticos & Medicos è medio tollit,) volatilia, fortia, activitate penetranti prædita, qualia Chemia suppeditat, requiruntur. Fuliginem modo nominavimus, è qua utut vilissimo fumariorum & ca-

minorum parietes defœdante corpore, quantæ efficacitatis medicamentum chemia exhibeat novi Medicis non infimi subsellii usu exploratum esse; & in methodo sua parandi varias Essentias atque Spiritus chemicos extemporaneè sine igne, aut destillatione id explicuit Medicus Ducalis Saxonicus Gabriel Clauderus. *Tres guttæ*, scribit Johannes Hartmannus in Pr.Chymiatr. *spiritus fuliginis exhibitæ agonizanti eum mirabiliter refocillando exsuscitant.*

X.

Nihil autem vanius est, quam oggannire illi, quod usus reapse experiundo edocuit, & philosophicis iisque pauperrimis ratiunculis, quod experientia firmavit labefactare velle; quod fecisse visus est Medicæ rei ignarus, & invita arte Chemicorum medicamentorum præstantiam sequentibus verbis impugnans, infelix hic vates, alias naturalium rerum recondita scientia imbutus Joh. Bapt. du Hamel. l. 2. de fossil. c. ult. *Profecto nisi conjectura fallor, (falleris omnino & medica peritia te destitutum esse prodis) nihil arte chymica vanius est, nec quenquam hoc errore duci oportet, ut sibi persuadeat, antimonium, hydrargyrum & alia mineralia, tuto citra ullum periculum assumi posse. Quid enim hæc, nisi venena esse possunt? nulla est illis cum corpore nostro familiaritas, nec calore nativo domari, cum sint naturæ insensissima, eamq; continenter laceessant; ex illa veluti pugna virium dejectio, humorum effervescentia, deliquia, convulsiones & gravissima oriuntur symptomata, quibus per sæpe natura, viribus impar, opprimitur &c. Quæ si vera sunt & sufficientia, ut tutam quidem, efficacem tamen simul medicinam*
amantes

amantes terreant, actum est de plurimis, quos rebelles morbi tenent; deferendi sunt ægri, quos morbi vulgaribus blandioribusq; remediis non expugnabiles lectis affigunt, & satius utique erit, curam plumbeo pugione non auspicari, quam languidis & effoetis remediis spes hominum primum inflare, deinde destituere; blando alloquio, & amicis verbis erigere, medela vero ipsa nunquam implere. Sic tamen eveniet, ut nobis ad chemicas præparationes trepidantibus animumque despondentibus, prudenter administrata, potentiori & strenua medicina alius morbum dissipet, lucrumque & gloriam reportet. Neque ullo modo errantium & intempestivo medicamentorum chemicorum usu nocentium infelicitas illorum præstantiæ quicquam derogare debet; sicuti notissimum est, nulli unquam Lycurgi severitatem laudatam, quæ vites exscindebat, ne quis inebriari vino posset. A qua non procul abest decretum illud Parisiense, quod mero rerum chemicarum odio, quamvis jam exoletum, produxit Doctissimus Casp. Hoffmannus de med. off. c. 90: Satis vero jam constat optimos quosque doctissimosque Parisiensium Medicorum circumspectum Antimonii usum hoc tempore nequidquam formidare.

XI.

Non ferendæ vero inscitiae character est Chemicas medicamentorum præparationes idcirco aspernari, quod à quibusdam sale abundantibus arroSIONES corporum quorundam fieri inimici artis chemicæ adducant, idemque in visceribus corporis metuumdum esse inculcent. Quæcunque duriora concreta,

metalla, lapides rodunt, illa sæpe extis vim nullam faciunt. Vanè hinc cum Riolano spiritus vitrioli usus indicitur, in morbis gravioribus adeo proficuum. Hæc enim si accipimus, nec aceto, nec citri succo, quibus lapides solvuntur, utendum est, acetum dissolvit corallia, spiritu vitrioli liquefit plumbum, stomacho damnum nullum infertur. Ovi in acetum positi testa durior dissolvitur & tota in liquamen abit, mollis & tenera quæ subjacet membranula intacta omnino relinquitur. Hinc illos non omnino ineptos arbitramur, qui salvis visceribus illæsisque permanentibus duriores calculum atteri à medicamentis quibusdam posse crediderunt.

XII.

Prorsus autem imperitè alii ab exaltatis illis rectificatissimis calidis & sulphureis medicamentis, Chemicalarte factis adustiones succorum, per accensiones humorum & spirituum, imo deflagrationes eorundem metuunt. Commentum est, quod producit Willis. de anim. brut. part. 2. l. 13: spiritus animales interdum adeo incallescere, ut ad incendium abripiantur à biliosi sanguinis æstu nimio, & ad cerebrum commotione, & hinc dependente delirii specie, quam phrenitidem vocamus; in quem errorem antehac Prosperum Martianum quoque deductum esse constat: Quasi scilicet in hoc casu idem fieret, quod in destillatione spiritus alicujus sulphurei intensiori igni expositi, qui inter destillandum flammam conciperet, ac efflagrans cum aperta flamma alembicum conscenderet; Eadem ratione sanguinem intensius exardescens spiritibus de se destillatis inflammationem & particulas quasdam adustas cerebro communicare.

nicare. Et simile quid à medicamentis illis fervidis & ardorem conciliantibus metuitur, cum tamen & humorum & spirituum natura ad incendium ejusmodi & deflagrationem quam ineptissima sit, & in corpore ipso locus & opportunitas accensionis cujusdam nullibi reperiatur. Succienim tubulis & visceribus continentur ac coercentur, neque caloris tantus gradus, ejusdemque talis species, quæ aduret, in corpore animali datur. Igneum illud, meras scintillas diffundens sincerum sulphur, & leviter tritum ac commotum in luculentas flammæ surgens, quod Phosphorum s. Noctilucam æream Boylei nuncupamus, nihil in corpore accendit, nihil adurit. Coepisse quosdam in Anglia penetrabilem hunc ignem medicinæ loco in Epilepsia habituali non sine successu adhibere acceperimus.

XIII.

Sicuti autem hæc omnia chemico modo parata, causarum morborum, quibus vincendis destinantur, distinctam cognitionem & aptam applicandi methodum requirunt & præsupponunt; ita eadem hæc, morborum origini & naturæ innixa, abundè persuadebit, non ubique & in omnibus morbis purissima illa concinnata, essentificata, concentrata, ab omnibus adhærentibus scoriis, & vi activa destitutis particulis liberata, præferenda esse. Inutiliter proinde se macerant, carbonem & operam perdunt Chemici, dum semper intenti sunt simplicibus prorsus purificandis illisque quæ infringunt coercent subtiles spirituosas salinas partes, ac proinde blandius medicamentum faciunt separandis student. Mixta enim sibi relicta, &

in substantia, ut loquimur, exhibita, bene interdum se gerunt, imo melius quam graduata, acriora, & vehementi operatione subitam mutationem, naturæ sæpe inimicam imo subinde periculofam afferentia. Interdum scorix & inertes ac superfluæ æstimatæ, vel terreæ, vel phlegmaticæ particulæ, aut relictæ, aut additæ, juvant, aptius & securius medicamentum reddunt, atque ut patiens illud melius toleret efficiunt. Aberrant itaque hic à scopo Chemistæ fumivenduli, & putidi ciniflones, dum in præparationibus finem illum perpetuo præfixum non attendunt; virtutes morbo quem debellare conamur oppositas integras servare & incorruptas. Hæ vero non semper in activis partibus, sed sæpe in aqueis, diluentibus & salium spicula discontinuantibus, sæpe in terreis, acidum sitientibus, & humiditates absorbentibus, & aliis, quæ non tam agunt, quam ab humoribus, quibus in corpore occurrunt patiuntur, reconditæ sunt. Sic præcipitantium vulgo appellatorum quæ temperando, imbibendo, invertendo, saturando & figendo agunt, usus passivus potius quam activus dicendus erit, cum ipsa non tam agendo in corporum partes, quam succorum occursum & impetum sustinendo proficua sint; adeoque immediate inde resultans effectus, privativus potius, quam positivus existat.

XIV.

Martis plurima præparata, quibus chemici salutis humanæ præsidem Artem se multum ornasse, & medelarum miracula facere posse confidunt, imbellia sunt remedia; Tincturæ scil. illius cum acidis factæ; salificationes ferri multæ sunt penitus inutiles.

Quis

Quisquis enim in quo efficacia chalybeatorum posita sit, & quid præcisè in corpore operentur cognovit, minus præparata vel extra corpus inutiliter saturata eliget. Zacutus Lusitanus l. 9. c. 10. obs. 3. inquit: *Macērant se cum Medicis Pharmacopœi in præparando chalybe, cum aliud sit facilius ad manus, minoris pretii, & incredibilis utilitatis. Est terra, quæ in mineris ferri reperitur, quam si sicces ad umbram, teras subtilissime, & in levorem redigas accurate, eademq; quantitate, ordine & forma in eisdem malis egrotantibus offeras, mirabilem, imo excellentiorem utilitatem quam ex præparato chalybe percipies, prout sæpissime felicissime semper sum expertus.* Vera hæc & experta esse, vivo testimonio confirmavit Malachias Geigerus Microcosmi sui hypochondr. cap. XXIV.

XV.

Dosium exilitatem suis medicamentis propriam dum insolentius Chemici jactitant, propriam turpitudinem, Medicinæ scilicet antiquæ Hippocraticæ se ignaros, patefaciunt; utpote quæ non minus talibus est instructa, quæ sub parva mole ingentes vires occultant. Neque etiam inde sufficientia Chemicorum medicamentorum, evinci potest, cum multis morbi tale sit ingenium quod quantitatem majorem illorum, quibus expugnanda est labes, exposcant. Etenim quando humectare & madida medicina aculeos mordacium humorum retundere & hebetare intentio est, quando fluxis ariditatem corrigere, acidos succos, magna copia visceribus crebro inhærentes invertere, per diuresin & diaphoresin expellere cupimus, tenuissima autem & per parvula quantitate
C
medicinas

medicinas exhibemus, inanem sumimus laborem, facilius sæpe aquam è pumice, quam serum è consuetis viis elicitori. Copia sæpe opus est & ab hac sola non exiguum sæpe commodum; præsertim etiam illis in casibus, quando aliquot indicationibus uni medicamento satisfacere est consilium. Hinc felicius sæpe curabant veteri ævo, dum multis intentionibus unicum opponebant medicamentum, ubi alterare, & evacuare, ubi bilem nimis acrem attemperare, eandemque excludere, ubi phlegmata in pectore hærentia attenuare & convenienter per alvum & anacatharsin educere erat animus; quid enim decocta longa, quid majori quantitate hausta apozemata tum valeant, probe norunt, qui horum vim sunt experti.

XVI.

In plerisque fermè pectoris affectibus, plus præstabit, qui vulgari modo factis utitur, qui blande operantia ex communibus & usitatissimis herbis decocta usurpat, quam qui solis Chemicis uti constituit, & quæ ignis vexationes diutius non sustinuerunt fastidit. Habent enim plurima ex Chemicorum hypocaustis deprompta activitatem nimiam, tenerrimo pulmonum parenchymati infestam, receperunt acrimoniam, aut *εμπύρεσμα* ab igne contraxerunt, pectori, suaviter agentia nunquam non poscenti, ut plurimum adversum. Valentia, qualia chemica sunt, pleraque tabescentibus noxia inculcat Ballonius consil. 2. In hæmoptysi melius se gerunt & securiora sunt simplicia, virtute astringendi & glutinandi prædita, Decocta ex vulnerariis, epiceraisticis & incrassantibus parata,

parata, quam Tincturæ antiphthificæ, quarum infallibilitatem magnificis laudibus celebrant propriarum compositionum ebuccinatores. Meretur prædicari ille à recentioribus revocatus mos balsama vulneraria ad sanandas læsiones internas necessaria, non ex oleis destillatis ignem expertis adornare, sed balsama hæc & antiphthifica ex parabilioribus aliis, butyro, oleo hyperici, balsamis naturalibus, Terebinthina ipsa componere.

XVII.

Diligentissimè antequam ad Chemica deveniamus constitutio & temperamentum corporis investigandum est, sicuti enim in robustioribus tuta magis & innoxia, sic etiam in tenerioribus & delicatulis intuta sæpe & insidiosa sunt. Neque probandum arbitramur illorum præproperam & immaturam in præscribendis medicamentis festinationem, qui non prout fas erat à blandioribus pedetentim ad validiora progrediuntur, sed à potentioribus & vehementibus, cum ægri molestia vim exferentibus, curam auspiciuntur. In medendo gradus tenere oportet, sensim ab imbecillioribus ad potentiora ascendendo. Initiis morborum valida, uti chemica, non convenire Ballonius Consil. p. 378. & ibidem medicamenta levia sub finem curæ, convalescere jam incipientibus ægris apta esse scribit. Prudens hæc regula in praxi valde utilis divinum olet Hippocratem, cujus præceptis laus omnis inferior est, & cum quibus specifica sua extollentium temeritas ne conferri quidem debet. Is lib. de locis in homine LV hæc habet: *Medicamenta fortia à natura in debilibus morbis dare non oportet, neq; pau-*

citare medicamenti debilitas ipsius facienda est: sed fortibus natura fortibus pharmacis utendum est, debilibus vero, pharmacis non fortibus. Neque partiendum est medicamentum, sed singulis secundum naturam debilibus quidem debilia à natura, fortibus vero morbis, fortis naturæ pharmaca exhibenda sunt.

XVIII.

In nephritidis & calculi cura lithontripticis, acrioribus salibus, tincturis & essentiis refricari malum, cruciatus intendi, symptomata alia acerbissima excitari ab ipsis observatum est chemicis, qui melius his quoque affectibus succurri vulgaribus, emollientibus, lenientibus, dolores demulcentibus, confitebuntur. Eleganter hæc confirmabunt, illa quæ Pechlinus in observationibus nuperrimè editis proponit, ubi pag. 36. calculi renalis curationem expendens, plane ex sententia ita loquitur: *Profecto, si Indicantium in illa Empirices invalescentis auctoritate aliqua adhuc vis est, nulla etiam post curiosum examen magis convenire morbo illi possunt, quam aquea, dulcia, pingua, & quibus aliquid inest nitrosi, aut si quid renali fermento affinius urinæque juvat secretionem in quo casu cum omnibus numeris absolutum sit Foresti decoctum, dubitem ego an quid convenientius morbo huic excogitari possit. Mihi certe in plurimis felicissime cessit ejus usus. Reperias autem ibi primo aquam, ceteræ virtutis vehiculum, quæ etiam mucosum pelvis involucrum diluio solvat, materiamque præbeat seri. Reperias mucilaginosam, matvæ, althææque semina, dulce caricarum, sebesten & glycyrrhizæ delinimentum, bordeum denique & ciceres, quæ cum nitrosa consent. & abstergente facultate,*

te, & secretionem adjuvant seri, mutantisque fermenti renalis vires confirmant: Quibus si dein juscula adjungas vitulina, acido citri, oleo amygdalarum dulcium, manna tabulata, & Syrupo de Althea Fernel. parte etiam vini mosellani delibuta, jam haberi puto, quod omnibus Chemicorum arcanis ipsi imprimis Aroph & Samech Paracelsi fastum facere possit; nam cum hæc uni aut summum alteri indicationi illa ex æquo omnibus respondent.

XIX.

Rectius omnino in aliis etiam morbis, præsertim compositis & complicatis ad casus præsentis applicantur illa, quæ ex variis simplicioribus conjuncta sunt medicamenta & ex his imprimis decocta. Spernuntur autem hæc Galenico modo facta hodie à multis, etiam illa de causa, quod ad angustissimos limites ab illis cogatur longissima Medicina; per talia ægrotis subveniendi mos seculorum experientia stabilitus contemnatur, quoniam exacta simplicium ac tot herbarum notitia ad illum requiritur. Neque vero dubium est per hunc simplicium radicum, foliorum, florum, seminum, fructuum vires extrahendi modum, has integras servari & sine magna immutatione nativas facultates elici; cum è contrario chemicorum mixturæ virtute nativa raro operentur, sed artis beneficio novam acquisiverint.

XX.

Lentis & tardioribus remediis quosdam morbos felicius tractari superius indicavimus, & moniti hujus veritatem in non paucis affectibus alimentorum medicamentosorum continuatus usus evincit, quo id sæ-

pe perficimus , quod à pomposis chemicorum arcanis fieri nequit , qualia inviti crebro assumunt morbis detenti , cum blandiora talia & consueta libenter & pronis animis diutius usurpent , quæ naturæ vim nullam inferentia , ventriculo amica , successive sanguinis & humorum gravissimas corruptiones delent. In victu medicato Antiqui quærebant præsidium , jusculis medicatis prosperrimè semper , ancipiti fortuna nunquam utebantur ; quem morem in desuetudinem fermè nunc abiisse non immerito mirantur veræ medicinæ periti. Chemicis enim tale quid ægrè præstatur , quandoquidem pleraque illa acria sunt & in illa consuetudine naturæ adversa ; alimenta autem , quæ medicamentosam habent facultatem , uti naturæ magis congrua , ita & visceribus minus infesta , in sanguinem facile admittuntur. Quid lactis usu in scorbuticis , arthriticis , hæcticis effectum sit , quomodo continuato eodem plurimi veluti renati , novum habitum induerint , cognitissimum est. Quomodo calidæ potus morbos graves & chronicos si non propulset , certè tolerabiliore reddat , multumque levaminis afferat , & si in sale est vitium , illud ex voto eluat , hodie decantata & propemodum pervulgata res est.

XXI.

Et si autem ex his ut opinor , non obscurum amplius sit , quanta moderatione utendum Galenicorum pariter , atque Chemicorum medicamentorum præconibus , & solidam scientiam opportunitatis ad hæc vel illa eligenda , necessariam esse ; in non paucis tamen casibus utraque utilissimè conjunguntur. Neq;
hujus

hujus copulae multiplicem fructum quisquam nisi plane inexpertus, in dubium vocabit. Quæ enim vulgari modo parata sunt, interna pariter ac externa, per chemica addita acuuntur optimè, & interdum veluti animantur, alias parum opis allatura. Sic in vehiculo decocti ex aperientibus & diureticis facti, si penetrantem aperituum liquorem, si Tincturam Ame- lungi, vel similem exhibeas, melius sæpe finem propo- situm consequeris. Decocta radicum & lignorum dia- phoretica per injecta aut instillata volatilia salia multo generosiora & certioris effectus fiunt; quemadmodum electuaria, pro firmando languente ventriculo aliisque primarum affectibus expugnandis præscripta, & pa- lato magis blandiuntur, & expeditius agunt, quod de- bebant, si aromaticis oleis eadem imbuas. Lini- menta, olea, externe corpori inungenda balsama, volatilium sal convenienter junctus multo reddit for- tiora. Clysteres pro scopo carminativo vapores dis- cutiente præscripti salia volatilia nonnunquam recipi- unt, & spiritum salis armeniæ enemati additum contra vermes & colicam Glauberus part. 2. Furn. Phil. commendat. Alii in hysterice passionibus idem non infeliciter sunt imitati. Riverius Prax. l. XV. c. 6. Clysterem hystericum discutientem cum aqua vi- tæ parat. In calculi acerbo dolore cum dira colica oleum succini enemati instillatum proficuum valdè deprehendit Cl. Dn. Præses.

XXII.

Sicuti autem copiosa optimorum medicamen- torum supellex Medicum nullo modo facit, ita & in- eligendis tum Galenicis, tum Chemicis aut utrisque combi-

combinandis iudicio Practico opus est, ut singula singulis suo tempore, loco, & mensura exhibeantur. Citra methodum enim medicamenta non solum non erunt *ἡσών χεῖρες*, sed potius, ut in proverbio nunc est, ignis in manu stulti, aut gladius in manu furiosi. Hæc autem methodus, hæc leges medicinæ, naturæ legibus sunt consentaneæ; ut in præfat. l. i. Therapeut, pluribus explicat Fernelius. Cui ita assentimur, ut simul placeat sagax doctissimi Vallesii Iudicium, qui Meth. Med. l. 4. c. 2. ita loquitur: *Multa sunt in arte medica in quibus urgentiæ causa ab arte recedere, ars est. Nam cum sint in ea multa præcepta legitima, & regularia, perpetua tamen nulla sunt. & qui ulla habet pro perpetuis & inviolabilibus, methodicus dici potest, rationalis autem minime. Nam rationalis non curat ex libello aut commentario, sed ut in re quavis exercitata ratio dicat, & nullis se legibus tanquam pragmaticis obligat.*

SOLI DEO GLORIA.

